



Selasa, 27 Pebruari 2024
Ogen: Perbahanen Rasul-rasul 9:40



O Tabita, Kekeken!



Adi kita nggeluh, lit pagi paksana kita mate. Perlu sungkun man dirinta, kira-kira kai nge pagi nina kalak adi aku mate? Tabita selama geluhna, mehuli ras melumbar. Nggit ia nampati, iberekenna baju man diberu-diberu si enggo mbalu, iperdiatekenna keperluan geluh sekelewetna. Ia mehamat ras banci erteman ras ise pe. Perbahanen Tabita enda iinget perpulungen e, e maka tupung ibegi perpulungen e ia enggo mate, sada pe la lit si lepas tangan. Kerina rukur kai arus ilakoken dengen muat bagin ndahiken si mehuli guna Tabita. Mis lit sinapui ras ngkimbangi amak i rumah Tabita, lit si kuskas mpesikap mait Tabita, deba lit si ngelegi Petrus. Teridah perpulungen ersada arih ngelakoken simehulina. Pas bagi kuan- kuan kalak karo, kai si isuanndu e ka nge si iperanindu. Perbahanen Tabita si mehuli, alokenna ka nge perbahanen si mehuli i bas teman-temanna nari aminna pe lanai iidahna. Tupung Petrus bengket ku rumah Tabita, diberu-diberu si lit I je nuri-nuri kerna perbahanen Tabita si mehuli. Kerina erceda ate, kerina nuriken pengalamenna ras Tabita.

Tapi, la terjeng teman-temanna si ersemulih erbahan si mehuli man bana, Tuhan pe ngidah kai siibahanna e mehuli. Arah Petrus, Dibata erdahin mpegeluhken Tabita i bas si mate nari. Nina Petrus, O Tabita, kekeken! Perkatan Petrus e nuduhkan lit kuasa si banci empegeluheken Tabita. Labo kuas Petrus tapi kuasa Tuhan si ngasup mpekeke kalak si enggo mate. Tuhan ngenehen perbahanen Tabita si mehuli selama geluhna, janah ibereken Tuhan mulihi kegeluhen kenca ia mate.

Enda pe sada jaminen man banta maka lit denga pagi kegeluhen kenca kita mate. Jadi, ope lenga kita mate me perlu sicidahken kinitekennta man Tuhan e alu ngelakoken perbahanen perbahanen si mehuli ku sekelewetta?